

Кондак 1

Избранной от всех родов Пресвятей Деве Богородице, явившейся иногда клирику болящу во еже исцелити его от болезни лютыя, похвальныя приносим пения: Ты же Всемиловитая Владычице, яко имущая державу непобедимую, от всяких бед и скорбей и болезней свободы ны зовущия Ти:

Радуйся, Благодатная Целительнице душ и телес наших.

Икос 1

Архангел Гавриил, возвещая Пресвятей Деве Марии безсеменное зачатие от Нея Сына Божия, рече: Радуйся; Благодатная, Господь с Тобою, Благословенна Ты в женах, мы же грешнии гласу Архангелову подражати дерзающе с верою и любовию благоговением вопием пения сиевая:

Радуйся, от начала веков во главу нашего спасения предизбранная;

Радуйся, многообразне от пророков предвозвещенная.

Радуйся, Невесто Неневестная, заченшая Сына от Духа Святаго;

Радуйся, Мати в рождестве и по рождестве пребывшая Дево.

Радуйся, одеющего светом яко ризою пеленами повившая;

Радуйся, млеко питавшая горняго и дольняго благодатию своею питающаго.

Радуйся, на руку Твоею носившая Вседержителя;

Радуйся, о Промыслителе всея твари попечение имевшая.

Радуйся, паче всех от Него превознесенная;

Радуйся, честнейшая и славнейшая без сравнения всех небесных сил.

Радуйся, Благодатная Целительнице душ и телес наших.

Кондак 2

Видяще Пресвятая Владычица усердные и благоговейные клирика Викентия на всяк день преклоняющаго колена пред честным Твоим образом и Архангельское приветствие Тебе приносящего, приняла еси таковое его благоугождение и даровала еси ему во дни болезни внезапное и дивное со одра восстание. Тем же и мы преклоняем колена душ и телес наших пред Цельбоносным Твоим образом, Госпоже наша Богородице, и поминающе чудное явление болящему клирику, вопием Сыну Твоему и Богу нашему: Аллилуиа.

Икос 2

Разумев чудесное исцеление от тяжкого недуга, клирик Викентий, восста с убогого ложе своего, иде в церковь и тамо песньми хвалебными прослави Тя Целительницу всех болящих, прими убо и от нас Мати Божия сии благохваления:

Радуйся, от врат смертных неисцельно болящих к жизни возвращающая;

Радуйся, сострадания к страждущим преисполненная.

Радуйся, пораженных различными недугом чудесно исцеляющая;

Радуйся, во всяких скорбех и печалех небесную отраду в сердца наша изливающая.

Радуйся, любовь к Богу и ближним нас воодушевляющая;

Радуйся, от растлевающих душу и тело соблазнов мира сего

сохраняющая.

Радуйся, скорая услышательница усердно Тебе молящихся;

Радуйся, источающая великия милости и щедроты любящим Тя.

Радуйся, уповающим на Тя вся потребная в животе сем дарующая;

Радуйся, ублажающих Тя в грозный час смерти не оставляющая.

Радуйся, Благодатная Целительнице душ и телес наших.

Кондак 3

Силою данною от Тебе, Госпоже Царице и Владычице, Святая икона Твоя источает неоскудно исцеления страждущим от недугов многоразличных и несумненную верою к Ней притекающих, Богу же вопиющих: Аллилуиа.

Икос 3

Имущи премногую любовь к роду христианскому и матернее о нем попечение всем просящим у Тебе помощи и заступление, всякое благое прошение скоро исполняеши; сего ради Тебе Всемощней Заступнице и скорой Помощнице нашей приносим похвалы сия:

Радуйся, скорбящих утешение;

Радуйся, безнадежных надеждо.

Радуйся, труждающих помощь и укрепление;

Радуйся, нищих одеяние.

Радуйся, алчущих питательнице;

Радуйся, обидимых и гонимых заступление.

Радуйся, обидящих устрашительнице;

Радуйся, в христианской вере наставнице.

Радуйся, взыскание погибших;

Радуйся, споручнице спасения грешных.

Радуйся, от лукавых бесов мощное защищение.

Радуйся, Благодатная Целительнице душ и телес наших.

Кондак 4

Бури страстей и похотей искушений бесовских избави нас, Премилосердная Богородице, укрепи и сохрани в нас до конца жизни нашея веру православную и преданность святей Церкви, да возможем невозбранно пети Господу Богу: Аллилуиа.

Икос 4

Слыша Господь на небеси Твоя о нас моления, Преблагая Владычице, исполняет скоро всякое прошение Твое, ведуще таковое матернее дерзновение к Сыну Твоему Иисусу Христу, вси к Тебе прибегаем и усердно молим Тя, предстательствуй за нас, многогрешных рабов Твоих, пред Всемогущим Создателем нашим, да не погубит нас со беззаконьми нашими, но да подаст нам оставление прегрешений, вопиющих Тебе из глубины души:

Радуйся, предстательнице пред Богом мир от бед спасающая;

Радуйся, Сына Твоего на милость к нам недостойным преклоняющая.

Радуйся, от запаления огненнаго росю молитв Твоих избавляющая;

Радуйся, удары молнии и грома от главы нашея отводящая.

Радуйся, хродивую мудрость века сего посрамляющая;
Радуйся, пути спасения заблудшим показующая.
Радуйся, грешным к Богу дерзновение дарующая;
Радуйся, изнемогающим в напастех, скорбех и искушениях
скоро помогающая.

Радуйся, в посте и молитве и Богомыслии пребывающим
присно спребывающая;

Радуйся, блага земная, суетная и скоро преходящая
презирати нас научающая.

Радуйся, к небесным и вечным сокровищам умы и сердца наша
возводящая.

Радуйся, Благодатная Целительнице душ и телес наших.

Кондак 5

Свет небесный озари храмину болящего клирика егда
предстала еси, Преблагая Владычице, даровати ему исцеление от
лютото недуга. О, Пресвятая Госпоже Богородице, просвети
помраченных многими грехами души наша и подаждь исцеление
болезнующим телесем нашим, да прославляя Твоя милости вопием
радостно Богу: Аллилуиа.

Икос 5

Видяще Тя Владычицу Богородицу пред огнезранным престолом
Пресвятыя Троицы стоящу и за христиан молящуюся, небесныя силы
и вси святии от века Богу угодившии немолчными славословиями
ублажают Тя. Мы же грешнии на земле любовь к Тебе подвизаеми
дерзаем воспевати Тебе сице:

Радуйся, Матернею любовью весь мир христианский
объемлющая;

Радуйся, всех верных благая Заступнице.

Радуйся, изрядная споборнице ведущим брань противу
искушений мирских и душевредных;

Радуйся, от всякия злобы и вражды миром и любовью
ограждающая.

Радуйся, всех прибегающих под кров Твой приемлющая;

Радуйся, наставнице целомудрия и воздержания.

Радуйся, подвижников благочестия к горнему Иерусалиму
Путеводительнице;

Радуйся, душепагубных ересей и расколов искоренительнице.

Радуйся, душеполезных знаний подательница;

Радуйся, скорая в бедах и печалех утешительница.

Радуйся, молитвенница наша пред Сыном Твоим и Богом.

Радуйся, Благодатная Целительнице душ и телес наших.

Кондак 6

Проповедует святая Православная Церковь множество чудес
Твоих великия Твоя милости, Преблагая владычице, яко грады и
веси ограждаеши, обители иноческия и жилища благочестивых
рабов защищаеши, обидимых заступаеши, и вся благая и
душеполезная ниспосылаеши всем прославляющим Тя и поющим Сыну
Твоему: Аллилуиа.

Икос 6

Светло красуется zde Госпоже Богородице, чудотворная Твоя

икона именуемая "Целительница", прогоняючи от всех верных тьму искушений и напастей и обильно источая исцеления. Сего ради во умилении зовем Ти:

Радуйся, от неисцельных болезней скорое исцеление подающая;

Радуйся, от всяких бед и скорбей избавляющая.

Радуйся, греховныя страсти укрощающая,

Радуйся, колеблющихся в вере православней укрепляющая.

Радуйся, утешение благодатное изливающая в сердца

боголюбивыя;

Радуйся, надеждою небесных благ верных души услаждающая.

Радуйся, в добрых делах преуспевати нам помогающая;

Радуйся, от видимых и невидимых враг нас защищающая.

Радуйся, благодатию Твоею падших восставляющая;

Радуйся, страх Божий в сердца наша вселяющая.

Радуйся, вся благая прошения наша скоро исполняющая.

Радуйся, Благодатная Целительнице душ и телес наших.

Кондак 7

Хотящи явити милосердие Твое неизреченное даровала еси нам Препоблагая Богородице Дево, чудотворную Твою икону именуемую "Целительницею", да вси притекающи к Ней с верою от болезней свободяются и всякаго утешения сподобляются, сего ради вопием о Тебе Богу; Аллилуиа.

Икос 7

Дивна и преславна дела Твоя, Пренепорочная Владычице, всем бо богатым и нищим, здоровым и болящим, и с прилежною молитвою пред Цельбоносною иконою притекающим вся благая по коегождо потребе и в меру веры и любве подаеши, темже и мы не таим Твоих благодеяний, но благодарственно прославляя милости Твоя глаголем Ти сице:

Радуйся, глухих слышание;

Радуйся, слепых прозрение.

Радуйся, немых глаголение;

Радуйся, хромым хождение.

Радуйся, прокаженных очищение;

Радуйся, расслабленных укрепление.

Радуйся, от злых и лукавых духов свободение;

Радуйся, по Бозе наше прибежище и заступление.

Радуйся, от нужд, и печалей, и бед непреложное избавление;

Радуйся, пристрастие к тленному богатству искореняющая.

Радуйся, искати богатство нетленное на небеси научающая.

Радуйся, Благодатная Целительнице душ и телес наших.

Кондак 8

Странники и пришельцы в мире сем скорбнем и многмятежном, вечнога небеснаго отечества взыскуем и Тебе всемогущую Царицу Приснодеву Богородицу смиренно просим, путеводствуй нас по стезям спасительных заповедей Сына Твоего Христа Бога нашего, да избежим сетей невидимаго врага, возможем невозбранно воспевати Вседержителю Богу песнь: Аллилуиа.

Икос 8

Весь мир христианский убождает Тя Пренепорочную Деву гласы хвалебными всем верным, наипаче же болящим утешительно есть взирати на всечестную икону Твою "Целительница" именуемую. О, Пречудная Госпоже Богородице, прими и наша умиленная благохваления таковая:

Радуйся, Радосте наша;
Радуйся, доброто несказанная.
Радуйся, высоту добродетелей;
Радуйся, глубоко смиренномудрия.
Радуйся, неистощимый источнице милостей и щедрот.
Радуйся, благоуханный цвете Девства и чистоты.
Радуйся, веры христианския утверждение;
Радуйся, нечестие обличение.
Радуйся, горних сил похвало;
Радуйся, всех праведных славо.
Радуйся, Благодатная Целительнице душ и телес наших.

Кондак 9

Все упование на Тя возлагаем Мати Божия и в скорбех и болезнях ко святой иконе Твоей с благоговением и верою притекаем, чающе от Нея скоро утешение и исцеление получитьи. О, Пресвятая Царице Богородице, воззри милостивно на нас смиренных рабов твоих и ускори исполнити вся яже на пользу нам в сей жизни и в будущей. Да прославляя Твое благоутробие воспеваем Творцу Богу: Аллилуиа.

Икос 9

Ветии многовещаннии не возмогут достойно восхваляти Тя, Пречистую Деву Честнейшую Херувим и Славнейшую без сравнения Серафим, безсеменно рождшую Спаса душ наших. Мы же аще и немощнии, обаче любовью к Тебе побеждаеми, отверзаем недостойныя уста своя на похвалу Тебе сицевая:

Радуйся, чудес Христовых начало;
Радуйся, исполнение всех пророчеств.
Радуйся, чистотою Ангелов превосшедшая;
Радуйся, девство и рождество в себе чудно сочетавшая.
Радуйся, в обою непорочно и свято себе сохраняющая.
Радуйся, Мати Сына Божия и Бога Вышняго.
Радуйся, падшему человечеству отверзшая вход в Царствие горнее;
Радуйся, тихое пристанище от бурь плавающих по морю житейскому.
Радуйся, Богом дарованная отрадо страждущим;
Радуйся, сияющая благодатию и славою предивных знаний и чудес.
Радуйся, Благодатная Целительнице душ и телес наших.

Кондак 10

Спасти хотя весь род человеческий от беззаконий и вечных муки, Человеколюбец Господь Тя Матерь Свою дарова в помощь, покров и защиту верующим в Него, прославляя таковое милосердие о нас грешных благодарственным сердцем и устны вопием Ему:

Аллилуиа .

Икос 10

Стена еси необоримая и заступления крепкое, Богородице Дево, всем с молитвою к Тебе прибегающим. Тем же убо и нас недостойных огради от лютых болезней и от всякаго злаго обстояния и подаждь во всех делах благовременную помощь и укрепление взывающим Ти:

Радуйся, Заступнице наша и похвало;

Радуйся, хранительнице наша и утверждение.

Радуйся, Отрадо наша и дивное о нас попечение;

Радуйся, известное прибежище наше во всех скорбных обстоятельствах.

Радуйся, младенцев воспитание.

Радуйся, юных наставнице целомудрия.

Радуйся, супругам любовь и согласие подавающая;

Радуйся, благоговеиных старцев к мирной кончине жития приводящая.

Радуйся, верных пастырей Святыя Церкви укрепляющая и вразумляющая;

Радуйся, в иноческом образе подвизающимся ходатаице вечнаго радования.

Радуйся, в мире благочестиво живущих неоставляющая Своим заступлением.

Радуйся, Благодатная Целительнице душ и телес наших.

Кондак 11

Пения и мольбы всеумиленныя наши приносимыя пред цельбоносным Твоим образом, приими Приснодево Богородице, и сподоби до конца жизни нашея Единому Богу воспевати: Аллилуиа.

Икос 11

Светозарне сияет чудотворная икона Твоя, Мати Божия, источая верным токи исцелений благодатных, наставляя блуждающим во тьме грехов на светлый путь добродетелей и спасения. Сего ради вопием Ти хвалебныя песни таковая:

Радуйся, осенением Твоея иконы силу вражю от всех прогоняющая;

Радуйся, всем прибегающим в скорбех, нуждах и болезнех скорое утешение и исцеление подавающая.

Радуйся, чудо чудес, Одигитрие Владычице, на путь спасения наставляющая.

Радуйся, мирное устройство обуреваемым напастыми дарующая.

Радуйся, чистотою Твоею чистоту жития нас научающая;

Радуйся, лукавых, гордых и гневливых людей вразумляющая.

Радуйся, правую веру и страх Божий в нас вселяющая;

Радуйся, светом Христова учения тьму неверия прогоняющая.

Радуйся, смущение помышлений сумнительных удаляющая;

Радуйся, всех духовных даров щедрая Подательница.

Радуйся, Благодатная Целительнице душ и телес наших.

Кондак 12

Благодатию и щедротами Твоими, Премилосердная Владычице, не оставляеши христиан православных, даруя скорбящим утешение,

обидимым заступление, болящим и всем сущим в бедах
многообразных избавление, сего ради прославляюще Тя
благодарственно вопием Богу: Аллилуиа.

Икос 12

Поюще Твоя неизреченныя милости и чудеса являемыя нам
недостойным преклоняем колена перед цельбоносным Твоим
образом, Богородице Приснодево, молим Тя усердно, подаждь нам
мир, тишину и благую кончину и не остави без Твоея помощи и
заступления во Втором пришествии Сына Твоего и Бога нашего,
всех приносящих Ти со умилением сия похвалы:

Радуйся, в уныние и отчаяние впадших, надеждою спасения
укрепляющая;

Радуйся, узы греховныя разрешающая.

Радуйся, праведный на нас гнев Божий на милость
предлагающая;

Радуйся, земное житие наше добре устрояющая.

Радуйся, от опасных обстояний нас избавляющая;

Радуйся, в час кончины всем верным скорая Помощнице.

Радуйся, чтущих Тя на мытарствах воздушных заступающая;

Радуйся, любовь к Тебе имущая врата райская отверзающая.

Радуйся, прославляющих Тя вечнаго блаженства в Царствии
Небесном сподобляющая.

Радуйся, не чтущих Тя перед всеми посрамляющая.

Радуйся, державная скорпомощница наша во дни тяжких
испытаний.

Радуйся, Благодатная Целительнице душ и телес наших.

Кондак 13

О Всепетая Мати Сладчайшего Господа нашего Иисуса Христа,
милостивно прими сие малое моление наше, избави нас от всякия
напасти, болезни и внезапныя смерти и сподоби нас наследниками
быти Царствия Небеснаго и со всеми святыми воспевати Сыну
Твоему и Богу нашему: Аллилуиа.

Этот кондак читается трижды, затем икос 1-й и кондак 1-й

Молитва к Пресвятой Богородице перед Ея иконой, именуемой «Целительница»

Прими, о Всеблагословенная и Всемошная Госпоже Владычице
Богородице Дево, сия молитвы, со слезами Тебе приносимыя от
нас, недостойных раб Твоих, ко Твоему цельбоносному образу
пение возсылающих со умилением, яко Тебе Самой zde сущей и
внемлющей молению нашему. По коемуждо бо прошению исполнение
твориши, скорби облегчаеши, немощным здравие даруеши,
разслабленныя и недужныя исцеляеши, от бесных бесы прогоняеши,
обидимыя от бед избавлявши, прокаженныя очищаеши и малыя дети
милуеши: еще же, Госпоже Владычице Богородице, от уз и темниц
свободаеши и всякия многообразныя страсти врачуеши: вся бо
суть возможна ходатайством Твоим к Сыну Твоему, Христу Богу
нашему. О Всепетая Мати, Пресвятая Богородице! Не престай
молитися о нас, недостойных рабех Твоих, славящих Тя и
почитающих Тя, и поклоняющихся со умилением Пречистому образу
Твоему, и надежду имущих невозвратну и веру несумненну к Тебе,
Приснодеве Преславней и Непорочней, ныне и присно и во веки

веков Аминь .

Тропарь Божией Матери ради иконы Ее «Целительница»

Тропарь, глас 4:

Яко Пресветлая Звезда, просия Божественными чудесы святыи Твой образ, Целительнице, подаждь убо и нам, Богородице Марие, исцеление недугов душевных и телесных, спасение и велию милость .

Ин тропарь, глас 1:

Любовию, Чистая Дево, Твою святую икону почитающим, и Божию Тя истинную Матерь прославляющим, и верно поклоняющимся Целительница явися, всякое зло и болезни от сих удаляющая, яко Всемогущая .

Кондак, глас 6:

Предстательство христиан непостыдное, ходатайство ко Творцу непреложное, не презри грешных молений гласы, но предвари, яко Благая, на помощь нас, верно зовущих Ти: ускори на молитву, и потщися на умоление, предстательствующи присно, Богородице, чтущих Тя .

Величание

Величаем Тя, Пресвятая Дево, Богоизбранная Отроковице, и чтим образ Твой святыи, имже точиши исцеления всем с верою притекающим .

[Празднование 18 сентября/1 октября](#)